

**GNIESSER**



**FASNACHT 2023**

**JETZ HÄMMER DR SÄMF!**

Kai « moutard » me bi de Franzoose !  
E Gourmetgryse sy jetz seen.  
S goot überall grad vyl in d Hoose  
doo isch dr Sämf grad s gringscht Brobleem.  
Es herrscht e Dürri, Gletscher schmelze  
Holz und Kupfer daas isch gnabb,  
bi Bier und Whisky fäälts zem Melze  
dr Sämfkorn-Noochschoob macht au schlabb.  
E mägg Ydiott verzellt e Sämf  
in Social Media oder Zytig,  
vo Schaffhuuse bis no Gämf  
und daas vom Määntig bis am Frytig.  
Es goot jetz wiirgglig grad um d Wuurscht  
hybryde Grieg und Döifelspaggt,  
mit Hungersnööt und eeländ Duurscht  
als Mäldige im Stundetaggt.  
Glyymagryse, Inflazioon  
beschimme unser dääglic Lääbe,  
Laitzins, Aarmuet, Rezessioon  
wo unseri Zuekunft fescht dien brääge.  
Propaganda kasch verbiete  
oder ebbe au verdrülle,  
d Obduggzioon vo dääne Niete  
zaigt s Hiirni denn als lääri Hülle.  
Sprudelwasser hämmer gäärn  
öb im Glaas oder im Pool,  
e Sabotaasche liggt jo fäärn  
an dääre Nord Stream syg nüt fuul...  
Es broodlet und es isch fataal  
die Wöscherei mit Gäld – emänd  
e riise Korruzbioonsskandaal  
im hailig EU-Parlamänt!  
Was darf me schrybe, was no saage?  
Daas alles isch e Grund zum Glaage:  
«Japonais und Russezopf?  
Wienerli und Moorekopf?  
Indianer, Eskimo?  
Maitlibai?, grad soowysoo!  
Peking-Änte, Beggeschmutz?  
Düürggehoonig, Kaffi Luz?  
Dreadlocks oder Afrohair?  
Buddha, Yoga, s Schwaarze Meer?  
Dräggspatz oder dummi Gaiss?  
Laggaff, Eesel?» S git grad Mais!  
Maint s Martheli zu iirem Maa:  
«Kumm Schatz, mir göön jetz go spaziere,  
d Schreebergäarte hänn allem Aaschyyn aa  
gnueg Frücht und Gmies zum feyn dinniere.»  
E Hündli hächlet mit letschter Graft  
zum Brunne - im Delyyrium,  
s git nyene me dr Lääbenssaft  
derfüür e Zwyyg Basylikum.  
Verschwänderischi Groossbau-Blaanig  
e Baudesaschter sonderglyche.  
«Nach mir die Sintflut», au sunscht kai Aanig  
und zaale diens jo nid die Ryyche.  
E Fylosoof uss Griecheland  
Pythagoras mit briemtem Naame,  
het gmaint, Sämf steerggi dr Verschtand  
daas hilft emänd de gaischtig Laame.  
Unseri Wält gheit us de Fuege  
dunggli Mächt und Graabekämpf,  
ka me no soorgloos in d Zuekunft luege?  
S isch allne glaar – JETZ HÄMMER DR SÄMF!

---

Bi Sämf und Wuurscht uff em Münschterblatz  
kasch stille dr Duurscht bim Ladäärneschatz